

KVK: Gobierno no tin un masterplan total pa San Nicolas

Sero Colorado lo haya mas hotel banda di Bahia Principe

ORANJESTAD – Camara di Comercio (KVK) a keda informa diasabra riba e plannan di minister Otmar Oduber pa San Nicolas. Pero ta constata cu 'no existi un masterplan total pa henter San Nicolas'. Locual si a sali cla: lo bin mas proyecto di hotel banda di Bahia na Sero Colorado.

E plannan di e ministerio di Turismo ta nifica cu banda di e hotel Bialha lo bin mas proyecto di hotel pa Sero Colorado. Esaki lo trece alrededor di 2500 camber di hotel, segun KVK. Bialha Principe lo construi mas o menos 1000 camber. Segun gobierno e trabou por cuminsa na maart/april.

E hotelnan tin consecuencianan pa mercado laboral local, tanto positivo como negativo, segun Camara di Comercio, cu lo mester analisa mas profundo. "També lo mester analisa e spin off cu e proyectonan por tin pa comercio local y eventualmente pone condicion na esaki. Asina cu e rapport definitivo ta disponibel, KVK lo duna su comentario riba e totalidad."

Mester un plan integral
E splicacion duna diasabra den un reunion extenso tabata bay mas tanto riba e plannan pa Sero Colorado y e caya principal di San Nicolas so. Pasobra minister a bisa cu pa loka ta e carteranan cu e ta maneha, e no por warda riba e desaroyonan cu tin di haci cu e refineria, asina KVK ta bisa. E minister ta haci awor caba loka segun su opinion ta lo corecto pa actua riba awor caba. Pero den vision di KVK mester bin un plan integral, incluyendo e tereno di refineria Valero, e centro comercial di e ciudad, e area di Sero Colorado y e demas partinan di San Nicolas. Pa varios aña KVK tin un vision integral asina.

E 'necesidad' di un masterplan total ta 'hustamente pa percura cu desaroyo den tur sector ta cuadra cu plannan cu ta existi eventualmente den otro area'. Y segun KVK, e tereno di e refineria ta hunga un papel importante, pasobra esey ta determina e posibilidad di desaroyo nobo canto di awa, incluyendo creacion di un downtown area nobo, cu un 'waterfront', algo innovando pa San Nicolas. E instancia ta bisa cu ta dis-



puesto pa colabora den un masterplan pa San Nicolas. Y cu lo cuminsa acerca diferente ministerio pa haya un bista riba e totalidad di aspecto cu mester tuma na cuenta.

Diferencia

Pues diasabra pasa minister a presenta solamente e plan pa Sero Colorado pa un centro comercial nobo, e proyectonan di hotel y e cambio pe caya principal di San Nicolas. E banco di inversion locual AIB ta finalizando un plan pa e caya principal cu segun KVK, 'ta encera varios aspecto di conservacion di her-

encia cultural (edificionan cu balor cultural y e creacion di varios museo), cu por sirbi como catalisado pa revitalisacion di e centro comercial di San Nicolas'.

Minister Otmar Oduber di Turismo, Transporte y Cultura a organisa e reunion aki despues KVK su comentario cu gobierno no ta envolvi KVK debidamente den e plannan pa San Nicolas. Minister a comenta despues e reunion cu esaki tabatin di haber tambe cu un problema di comunicacion interno cerca KVK mes. Y pa motibo

e traspaso di informacion a keda atras.

Pero den KVK su reaccion riba e reunion, por mira cu otro cos ta hunga un rol. E instancia ta aprecia cu minister a indica cu lo envolvi KVK mas den henter e proceso. Pero esaki no ta nifica cu e minister automaticamente por conta riba sosten di Camara di Comercio, manera e minister mes a aclaria. KVK ta haya 'necesario pa mantene su propio punto di bista, tambe ora esaki no ta cuadra cu vision di otronan'. □